

AMOS

Outeur : **Amos**
Aan : **Israeliete**
Rede : **Oor hulle**
Geskryf tussen : **geskiedenis.**
760-722 BCE

Voorwoord.

Die boek Amos handel oor die profeet Amos wat afkomstig is van louta maar wat teen die noordelike koninkryk Israhel optree. Dit was 'n tyd van materiale welvaart, politieke stabiliteit en uiterlike vroomdienstige aktiwiteit, maar ook van geestelike verval en van ernstige wanpraktyke op sosiaal – etiese gebied. Amos rig hom veral teen die sondes van onderdrukking, uitbuiting van armes en verkragting van die reg. In die slotverse van sy boek kondig hy Israhel se herstel aan.

Onafwendbare oordeel teen Israhel se bure.

1 Die woorde van Amos, een van die skaapboere uit Tekóa, wat hy gesien het aangaande Israhel in die dae van Ussía, koning van Juda, en in die dae van Ierhóbeam, die seun van Ioas, koning van Israhel, twee jaar voor die aardbewing.

2 En hy het gesê:

IEUE brul uit Sion en verhef sy stem uit Jerusalem, sodat die weivelde van die herders treur en die top van Karmel verdor.

Teen Damaskus.

3 So sê IEUE:

Oor drie oortredinge van Damaskus, ja, oor vier, sal Ek dit nie afwend nie; omdat hulle Gílead met ysterdorssele gedors het.

4 Daarom sal Ek 'n vuur slinger in die huis van Hásaël, en dit sal die paleise van Bénhadad verteer.

5 En Ek sal die grendel van Damaskus verbreek en die inwoners uit die laagte van Awen uitroei en die wat die septer dra, uit Bet-Eden, en die volk van Aram sal in ballingskap gaan na Kir, sê Aleim.

Teen Filistyne.

6 So sê IEUE:

Oor drie oortredinge van Gasa, ja, oor vier, sal Ek dit nie afwend nie; omdat hulle 'n ganse bevolking in ballingskap weggevoer het om dit aan Edom uit te lewer.

7 Daarom sal Ek 'n vuur slinger in die muur van Gasa, en dit sal sy paleise verteer.

8 En Ek sal die inwoners uit Asdod uitroei en die wat die septer dra, uit Askelon; en Ek sal my hand teen Ekron uitstrek, en die oorblyfsel van die Filistyne sal omkom, sê IEUE Aleim.

Teen Tirus.

9 So sê IEUE:

Oor drie oortredinge van Tirus, ja, oor vier, sal Ek dit nie afwend nie; omdat hulle 'n ganse bevolking as ballinge aan Edom uitgelewer het en nie gedink het aan die broederverbond nie.

10 Daarom sal Ek 'n vuur slinger in die muur van Tirus, en dit sal sy paleise verteer.

Teen Edom.

11 So sê IEUE:

Oor drie oortredinge van Edom, ja, oor vier, sal Ek dit nie afwend nie; omdat hy sy broer met die swaard agtervolg het en sy jammergevoel verstik het, sodat sy toorn altyd verskeur en hy gedurigdeur sy grimmigheid behou.

12 Daarom sal Ek 'n vuur slinger in Teman, en dit sal die paleise van Bosra verteer.

Teen Ammon.

13 So sê IEUE:

Oor drie oortredinge van die kinders van Ammon, ja, oor vier, sal Ek dit nie afwend nie; omdat hulle die swanger vroue van Gílead oopgesny het om hulle grondgebied uit te brei.

14 Daarom sal Ek 'n vuur aansteek in die muur van Rabba, en dit sal sy paleise verteer, met

- krygsgeskreeu op die dag van stryd, in ‘n storm op die dag van die orkaan.
- 15 En hulle koning sal in ballingskap gaan, hy en sy vorste tesame, sê Aleim.

Oordeel teen Isrhael.

Teen Moab.

- 2 So sê IEUE:

- Oor drie oortredinge van Moab, ja, oor vier, sal Ek dit nie afwend nie; omdat hy die beendere van die koning van Edom tot kalk verbrand het.
- 2 Daarom sal Ek ‘n vuur slinger in Moab, en dit sal die paleise van Kéríjot verteer; en Moab sal met oorlogsrumoer sterwe, met krygsgeskreeu en basuingskal.
- 3 En Ek sal die regeerder onder hulle uitroei en al hulle vorste saam met hom doodmaak, sê Aleim.

Teen Juda.

- 4 So sê IEUE:

- Oor drie oortredinge van Juda, ja, oor vier, sal Ek dit nie afwend nie; omdat hulle die wet van Aleim verwerp het en sy insettinge nie onderhou het nie; en hulle leuengode het hulle verlei waar hulle vaders agter aan geloop het.
- 5 Daarom sal Ek ‘n vuur slinger in Juda, en dit sal die paleise van Jerusalem verteer.

Teen Isrhael.

- 6 So sê IEUE:

- Oor drie oortredinge van Isrhael, ja, oor vier, sal Ek dit nie afwend nie; omdat hulle die regverdige vir geld verkoop het en die behoeftige vir ‘n paar skoene.
- 7 Hulle wat daarna hyg dat die stof van die aarde op die hoof van die armes kom, en wat die weg van die ellendiges buig; en die man en sy vader gaan na dieselfde jongedogter om my heilige Naam te ontheilig.
- 8 En hulle strek hul uit op verpande klere by elke altaar, en die wyn van die wat beboet is, drink hulle in die huis van hul god.

- 9 En tog het Ék die Amoriet voor hulle uit verdelg wie se hoogte was soos die hoogte van die seders, en hy was sterk soos die eikebome; maar Ek het sy vrug daarbo en sy wortels daaronder verdelg.
- 10 Ook het Ek julle uit Egipteland laat optrek en julle veertig jaar lank in die woestyn gelei, om die land van die Amoriet in besit te neem.
- 11 En Ek het uit julle seuns profete en uit julle jongelinge nasireërs verwek. Is dit nie so nie, o kinders van Isrhael? spreek Aleim.
- 12 Maar julle het die nasireërs wyn laat drink en aan die profete bevel gegee en gesê: Julle mag nie profeteer nie!
- 13 Kyk, Ek laat dit onder julle kraak, soos ‘n wa kraak wat vol gerwe is;
- 14 sodat die wat gou is, nie kan ontvlug nie, en die sterke sy krag nie kan ontwikkel en die held sy lewe nie kan red nie.
- 15 En die boogskutter sal nie bly staan en die wat gou is op sy voete, nie vrykom nie, en die perderuiter sal sy lewe nie red nie.
- 16 En die dapperste onder die helde sal op dié dag naak wegvlug, spreek Aleim.

Veroordeling van Samaria.

Eerste Straf: Komende Oordeel.

- 3 Hoor hierdie woord wat IEUE oor julle gespreek het, o kinders van Isrhael, oor die hele geslag wat Ek uit Egipteland laat optrek het, naamlik:
- 2 Julle alleen het Ek geken uit al die geslagte van die aarde; dáárom sal Ek by julle besoeking doen oor al julle ongeregthede.
- 3 Sal twee met mekaar wandel tensy hulle eers afgespreek het?
- 4 Sal ‘n leeu brul in die woud as hy geen prooi het nie? Sal ‘n jong leeu sy stem uit sy lêplek laat hoor as hy niks gevang het nie?
- 5 Sal ‘n voël in ‘n net val op die grond as daar vir hom geen strik gestel is nie? Sal ‘n wip van die grond af opspring as dit glad nie gevang het nie?

- 6 Sal die basuin in die stad geblaas word en die bevolking nie skrik nie? Sal daar 'n onheil in die stad voorval as Aleim dit nie bewerk het nie?
- 7 Want IEUE Aleim doen niks tensy Hy sy raadsbesluit aan sy knegte, die profete, geopenbaar het nie.
- 8 Die leeu het gebrul, wie sal nie vrees nie? IEUE Aleim het gespreek, wie sal nie profeteer nie?

Die Volk weet nie hoe om reg te doen nie.

- 9 Roep dit uit oor die paleise van Asdod en oor die paleise van Egipteland en sê: Versamel julle op die berge van Samaria, en aanskou die groot beroering in die midde van die stad en die verdrukking daarbinne.
- 10 Ja, hulle weet nie om reg te doen nie, spreek IEUE —hulle wat geweld en verdrukking opstapel in hulle paleise.
- 11 Daarom, so sê IEUE Aleim:
- 'n Vyand! En dit rondom die land; en hy sal jou vesting van jou af neerwerp, en jou paleise sal geplunder word.
- 12 So sê IEUE:
- Soos 'n herder 'n paar pote of 'n oorlappie red uit die bek van 'n leeu, net so sal gered word die kinders van Israhel wat daar in Samaria in die hoek van 'n bed of op die damás van 'n rusbank sit.
- 13 Hoor en waarsku die huis van Jakob, spreek IEUE Aleim, die Aleim van die leërskaars,
- 14 dat Ek in die dag as Ek die oortredinge van Israhel aan hom besoek, ook besoeking sal doen oor die altare van Bet-el, sodat die horings van die altaar afgekap sal word en op die grond val.
- 15 Dan sal Ek die winterhuis saam met die somerhuis tref, en die huise van ivoor sal te gronde gaan, en baie huise sal verdwyn, spreek IEUE.

Aleim se straf het Israhel nie verander.

Tweede Strafrede: Verskerping van die Aanklag.

- 4 Hoor hierdie woord, koeie van Basan, wat op die gebergte van Samaria is! Wat die armes verdruk, die behoeftiges hard behandel; wat aan hulle here sê: Bring aan en laat ons drink!
- 2 IEUE Aleim het gesweer by Sy heiligheid: Kyk, daar sal dae oor julle kom dat hulle julle met hake sal optrek en die wat van julle oor is, met vishoeke.
- 3 En julle sal deur bresse in die muur uittrek, elkeen sonder om weg te kyk, en julle sal weggewerp word na Harmon, spreek IEUE Aleim.
- 4 Kom na Bet-el, en sondig! Na Gilgal, sondig nog meer! En bring julle slagoffers in die môre en julle tiendes al om die derde dag.
- 5 En laat van wat gesuurd is, 'n loffer rook, en roep vrywillige offers uit, laat dit hoor! Want so is dit na julle sin, kinders van Israhel, spreek IEUE Aleim.

Maak jou klaar om voor Aleim te verskyn.

- 6 Alhoewel Ék julle reinheid van tande gegee het in al julle stede en broodsgebrek in al julle woonplekke—noggans het julle jul tot My nie bekeer nie, spreek Aleim.
- 7 Alhoewel Ék die reën van julle teruggehou het toe dit nog drie maande voor die oestyd was en op die een stad laat reën maar op die ander nie laat reën het nie, die een stuk land reën gekry het, maar die ander waarop geen reën geval het nie, verdor het;
- 8 en twee, drie stede na een stad geslinger het om water te drink sonder om die dors te les—noggans het julle jul tot My nie bekeer nie, spreek IEUE.
- 9 Ek het julle met brandkoring en met heuningdou swaar getref, baie van julle tuine en julle wingerde en julle vyeboom en julle olyfboom het die sprinkaan verslind—noggans het julle jul tot My nie bekeer nie, spreek IEUE.
- 10 Ek het die pes onder julle gestuur, op die manier van Egipte; Ek het julle jongmanne met die swaard gedood saam met die

wegvoering van julle perde; en Ek het die stank van julle laer laat opstyg, ja, tot in julle neus—noggans het julle jul tot My nie bekeer nie, spreek IEUE.

11 Ek het julle omgekeer soos Aleim Sodom en Gomorra omgekeer het, sodat julle soos ‘n stuk brandhout was wat uit die vuur geruk is—noggans het julle jul tot My nie bekeer nie, spreek IEUE.

12 Daarom sal Ek só met jou handel, o Israhel; omdat Ek só met jou sal handel—maak jou klaar om jou Aleim te ontmoet, o Israhel!

13 Want kyk, Hy wat die berge formeer en die wind skep en aan die mens sy gedagte bekend maak, wat die dageraad duisternis maak, wat op die hoogtes van die aarde wandel, IEUE, Aleim van die leërskaars, is Sy Naam!

Oproep tot Bekering.

Derde Strafrede: Israhel het Geval.

5 Hoor hierdie woord wat Ek oor julle as klaaglied aanhef, o huis van Israhel!

2 Die maagd van Israhel het geval, sy sal nie weer opstaan nie; neergewerp lê sy op haar land, niemand rig haar op nie.

3 Want so sê IEUE Aleim:

Die stad wat met duisend uitgetrek het, hou honderd oor; en die wat met honderd uitgetrek het, hou tien oor vir die huis van Israhel.

Vra na My Wil dan sal julle lewe.

4 Want so sê IEUE aan die huis van Israhel:

Soek My, dan sal julle lewe!

5 Maar soek Bet-el nie, en kom nie na Gilgal nie en trek nie deur na Berséba nie. Want Gilgal sal gewis in ballingskap gaan, en Bet-el sal tot niks word nie.

6 Soek IEUE, dan sal julle lewe, sodat Hy nie teen die huis van Ioseph uitbreek soos ‘n vuur wat verteer sonder dat iemand dit vir Bet-el kan blus nie.

7 Julle wat die reg in wilde-als verander en die geregtigheid teen die grond gooi!

8 Hy wat die Sewe-ster en die Oríon gemaak het en die duisternis in môrelik verander en die dag tot nag verduister, wat die waters van die see roep en dit uitgiet oor die oppervlakte van die aarde— IEUE is Sy Naam!

9 Hy wat verwoesting laat aanblits oor die sterke, en verwoesting kom oor die vesting!

Julle moet haat wat verkeerd is.

10 Hulle haat die man wat in die poort die reg handhaaf, en hulle het ‘n afsku van hom wat in opregtheid spreek.

11 Daarom, omdat julle die arm man vertrap en van hom ‘n heffing van koring neem, het julle huise van gekapte klippe gebou, maar julle sal nie daarin woon nie; julle het pragtige wingerde geplant, maar julle sal die wyn daarvan nie drink nie.

12 Want Ek weet dat julle oortreding menigvuldig en julle sondes geweldig is, julle wat die vyande is van die regverdige, wat omkoopgeld aanneem en die behoeftiges wegstoot in die poort.

13 Daarom swyg die verstandige in so ‘n tyd, want dit is ‘n onheilspellende tyd.

14 Soek wat goed is, en nie wat sleg is nie, sodat julle kan lewe en IEUE Aleim van die leërskaars, só met julle kan wees soos julle sê.

15 Julle moet haat wat sleg is en liefhê wat goed is, en handhaaf die reg in die poort—miskien sal IEUE Aleim van die leërskaars, Hom ontferm oor die oorblyfsel van Ioseph.

16 Daarom, so sê IEUE Aleim van die leërskaars, IEUE:

Op al die pleine weeklag! En op al die strate sal hulle sê: Ag, ag! En hulle sal na die landbouer roep om te treur, en te weeklaag na die wat verstaan om treurliedere te sing.

- 17 Ook sal daar in al die wingerde weeklag wees wanneer Ek in jou midde deurtrek, sê IEUE.

Die Dag van Aleim bring donker nie lig nie.

- 18 Wee die wat na die dag van Aleim verlang! Wat sal tog die dag van Aleim vir julle wees? Dit sal duisternis wees en geen lig nie.
- 19 Soos wanneer iemand vlug vir 'n leeu, maar 'n beer loop hom raak; of hy kom in die huis en leun met sy hand teen die muur, en 'n slang byt hom!
- 20 Is die dag van Aleim nie duisternis en geen lig nie, ja, donkerheid sonder 'n ligstraal?
- 21 Ek haat, Ek versmaad julle feeste en het geen welgevalle aan julle feestye nie.
- 22 Want al bring julle vir My brandoffers saam met julle spysoffers, Ek het daar geen welbehag in nie, en die dankoffer van julle vetgemaakte kalwers sien Ek nie met welgevalle aan nie.
- 23 Verwyder van My die geraas van jou liedere! En na die geluid van jou harpe wil Ek nie luister nie.
- 24 Maar laat die reg aanrol soos watergolwe, en geregtigheid soos 'n standhoudende stroom.
- 25 Het julle aan My slagoffers en spysoffers gebring veertig jaar lank in die woestyn, o huis van Israhel,
- 26 en ook gedra Sakkut, julle koning, en Kewan, julle beelde, julle stergod wat julle vir julle gemaak het?
- 27 Daarom sal Ek julle anderkant Damaskus in ballingskap wegvoer, sê IEUE wie se Naam Aleim van die leërskaars is.

Waarskuwings in Sion en Samaria.

- 6** Wee die gerustes in Sion en die sorgelose op die berg van Samaria, die vernames van die eerste onder die nasies, na wie die huis van Israhel kom!
- 2 Trek deur na Kalne en kyk, gaan van daar na Hamat, die groot stad, en trek af na Gat van die Filistyne! Is hulle beter as hierdie

koninkryke? Of is hulle grondgebied groter as julle grondgebied? —

- 3 julle wat die dag van onheil veraf stel en die setel van geweld nader skuiwe!
- 4 Wat op bedde van ivoor lê en uitgestrek lê op hulle rusbanke en die lammers van die kleinvee en die kalwers uit die stal eet!
- 5 Wat liedjies sing met begeleiding van die harp, wat net soos Dabid vir hulle musiekinstrumente uitdink!
- 6 Wat uit offerkomme wyn drink en hulle met die beste soorte olie salf, maar hulle nie oor die verbreking van Ioseph bekommer nie.
- 7 Daarom sal hulle nou op die voorpunt van die ballinge in ballingskap gaan, en daar sal 'n end kom aan die rumoerige gejubel van die leeglêers.
- 8 IEUE Aleim het by Homself gesweer, spreek Aleim, die Aleim van die leërskaars: Ek het 'n afsku van die trotsheid van Jakob en haat sy paleise; daarom lewer Ek die stad oor en al wat daarin is.
- 9 En as daar tien man in een huis oorgebly het, sal hulle sterwe.
- 10 En wanneer iemand se bloedverwant, die een wat hom wil verbrand, hom optel om die bene uit die huis te verwyder, en aan iemand wat in die agterste vertrekke is, sê: Is daar nog iemand by jou? en hy antwoord: Nee—dan sal die eerste sê: Bly stil, want dit is nie gepas om die Naam van Aleim te vermeld nie!
- 11 Want kyk, IEUE gee bevel, en hulle slaan die groot huis tot 'n puinhoop en die klein huis tot splinters.
- 12 Kan perde draf op rotse, of kan 'n mens met osse daarop ploeg? —dat julle die reg in gif verander en die vrug van geregtigheid in wilde-als.
- 13 Julle wat bly is oor 'n nietige ding, wat sê: Het ons nie deur ons eie krag horings gekry nie?
- 14 Want kyk, Ek gaan teen julle, o huis van Israhel, 'n volk opwek, spreek IEUE Aleim van die leërskaars, en hulle sal julle verdruk

van die ingang na Hamat af tot by die spruit van die Vlake.

Amos en Amásia.

Die Eerste Gesig: Sprinkane.

- 7** Dit het IEUE Aleim my laat sien—kyk, Hy het sprinkane geformeer toe die na-gras begin uitspruit het; en kyk, dit was die na-gras nadat die snysels van die koning af was.
- 2** En toe hulle al die gewasse van die land afgeëet het, sê ek: IEUE Aleim, vergeef tog! Hoe sal Iakob staande bly? want hy is klein.
- 3** Toe het Aleim berou gekry oor hierdie saak. Dit sal nie gebeur nie, het Aleim gesê.

Die Tweede Gesig: Vuur.

- 4** Dit het IEUE Aleim my laat sien—kyk, IEUE Aleim roep om 'n regstryd te voer deur vuur, en dit het die groot watervloed verteer en sou die akkerland verteer het.
- 5** Toe sê ek: IEUE Aleim, hou tog op! Hoe sal Iakob staande bly? want hy is klein.
- 6** Aleim het berou gekry oor hierdie saak. Dit sal ook nie gebeur nie, het IEUE Aleim gesê.

Die Derde Gesig: 'n Skietlood.

- 7** Dit het Hy my laat sien—kyk, IEUE het op 'n loodregte muur gestaan, en daar was 'n skietlood in sy hand.
- 8** Toe sê Aleim vir my: Wat sien jy, Amos? En ek het geantwoord: 'n Skietlood. Daarop sê IEUE: Kyk, Ek gaan 'n skietlood aanlê in die midde van my volk Israhel. Ek sal hom verder nie meer verbygaan nie.
- 9** En die hoogtes van Isak sal verwoes word, en die heiligdomme van Israhel sal puinhope wees, en teen die huis van Jeróbeam sal Ek met die swaard optree.

Amos en Amásia.

- 10** Toe het Amásia, die priester van Bet-el, Jeróbeam, koning van Israhel, laat weet: Amos het 'n sameswering gesmee teen u midde-in die huis van Israhel; die land sal dit onder al sy woorde nie kan uithou nie.
- 11** Want so het Amos gesê: Jeróbeam sal deur die swaard sterwe, en Israhel sal sekerlik uit sy land in ballingskap gaan.

- 12** Toe sê Amásia vir Amos: Gaan weg, siener, vlug na die land Juda en eet daar brood en profeteer daar!
- 13** Maar in Bet-el mag jy verder nie meer profeteer nie, want dit is 'n koninklike heiligdom en 'n tempel van die ryk.
- 14** Toe het Amos geantwoord en aan Amásia gesê: Ek was geen profeet en ook geen profete-seun nie; maar ek was 'n veewagter en kweker van wildevyebome.
- 15** Maar Aleim het my agter die kleinvee weggeneem, en Aleim het aan my gesê: Gaan heen, profeteer teen my volk Israhel.
- 16** Hoor dan nou die woord van Aleim! Jy sê: Jy mag nie teen Israhel profeteer nie, en jy mag geen woorde laat druppel teen die huis van Isak nie.
- 17** Daarom, so sê Aleim: Jou vrou sal in die stad hoereer, en jou seuns sowel as jou dogters sal deur die swaard val, en jou grond met die meetsnoer verdeel word, en jy self sal in 'n onrein land sterwe, en Israhel sekerlik in ballingskap uit sy land gaan.

Die Vierde Gesig: Somervrugte.

- 8** Dit het IEUE Aleim my laat sien—kyk, daar was 'n mandjie met somervrugte.
- 2** En Hy sê: Wat sien jy, Amos? En ek antwoord: 'n Mandjie met somervrugte. Toe sê IEUE vir my:
- Die einde het vir my volk Israhel gekom; Ek sal hom verder nie meer verbygaan nie.
- 3** En die liedere van die paleis sal in dié dag weeklaag, spreek IEUE Aleim: 'n menigte lyke; hulle gooi dit oral neer. Stilte!
- 4** Hoor dit, julle wat die behoeftige vertrap en daarop uit is om die ootmoediges van die land uit te roei,
- 5** deur te sê:

Wanneer is die nuwemaan verby, sodat ons koring kan verkoop, en die sabbat, sodat ons die graanskuur kan oopsluit—om die efa te verklein en die sikkal te vergroot en bedrieglik te handel met 'n valse weegskaal;

- 6 om die armes vir geld te koop en die behoeftige vir 'n paar skoene; ook die afval van die koring sal ons verkoop.
- 7 IEUE het gesweer by die hoogheid van Iakob: Gewis, Ek sal in ewigheid nie een van hulle werke vergeet nie.
- 8 Moet hieroor die aarde nie bewe en elke inwoner daarvan nie treur nie? Ja, dit sal oprys in sy geheel soos die Nyl en onstuimig opkook en wegsak soos die rivier van Egipte.
- 9 En in dié dag, spreek IEUE Aleim, laat Ek die son op die middag ondergaan en vir die aarde die lig duister word terwyl dit nog dag is.
- 10 En Ek verander julle feeste in rou en al julle liedere in klaagsang, en Ek bring op alle lendene 'n roukleed en op alle hoofde kaalheid. En Ek maak dit soos by die rou oor 'n enigste kind en die einde daarvan soos 'n bittere dag.
- 11 Kyk, daar kom dae, spreek IEUE Aleim, dat Ek 'n honger in die land stuur, nie 'n honger na brood nie en nie 'n dors na water nie, maar om die woorde van IEUE te hoor.
- 12 En hulle sal swerwe van see tot see en rondslinger van noord na oos, om na die woord van Aleim te soek, maar hulle sal dit nie vind nie.
- 13 In dié dag sal die mooi jongedogters en die jongmanne van dors beswyk—
- 14 hulle wat sweer by die skuld van Samaría, en ook sê: So waar as jou god leef, o Dan! en: So waar as die weg van Berséba leef! En hulle sal val en nie weer opstaan nie.

Wie kan Ontsnap van die Oordeel van IEUE.

Die Vyfde Gesig: Die Verwoesting van die Altaar.

- 9** Ek het IEUE by die altaar sien staan, en Hy het gesê:

- Slaan die kapiteel van die pilaar, sodat die drumpels bewe; en verpletter hulle bo die hoof van almal! En Ek sal die wat van hulle oorbly, met die swaard ombring: die vlugteling uit hulle sal nie ontsnap nie, en geen vrygeraakte onder hulle homself red nie.
- 2 Al dring hulle deur in die doderyk, my hand sal hulle daaruit haal; en al klim hulle op na die hemel, Ek sal hulle van daar laat neerdaal.
- 3 En al steek hulle hul weg op die top van Karmel, Ek sal hulle daar opspoor en weghaal; en al verberg hulle hul voor my oë op die bodem van die see, Ek sal van daar die slang ontbied om hulle te byt.
- 4 En al gaan hulle as gevangenes voor hulle vyande uit, Ek sal van daar die swaard ontbied om hulle dood te maak; en Ek sal my oog op hulle rig ten kwade en nie ten goede nie.
- 5 Ja, dit is IEUE Aleim van die leërskaare wat die aarde aanraak, sodat dit bewe en almal treur wat daarop woon; en dit sal in sy geheel oprys soos die Nyl en wegsak soos die rivier van Egipte.
- 6 Dit is Hy wat sy solders in die hemele bou en sy hemelgewelf bo die aarde vestig, wat die waters van die see roep en dit uitgiet oor die aardbodem, IEUE is Sy Naam!
- 7 Is julle nie vir My soos die kinders van Kus nie, o kinders van Israhel? spreek IEUE. Het Ek Israhel nie laat optrek uit Egipteland en die Filistyne uit Kaftor en die Arameërs uit Kir nie?
- 8 Kyk, die oë van IEUE Aleim is gerig teen die sondige koninkryk, en Ek sal dit van die aardbodem verdelg; maar Ek sal die huis van Iakob nie heeltemal verdelg nie, spreek IEUE.
- 9 Want kyk, Ek gee bevel en sal die huis van Israhel onder al die nasies skud soos in 'n sif

- geskud word, maar daar sal geen korrel op die grond val nie.
- 10 Al die sondaars van my volk sal deur die swaard sterwe, die wat sê: Die onheil sal ons nie bereik en ons nie ontmoet nie.
- 11 In dié dag sal Ek die vervalle hut van Dabid weer oprig, en Ek sal sy skeure toebou en sy puinhope herstel, en Ek sal dit opbou soos in die ou tyd;
- 12 sodat hulle in besit kan neem die oorblyfsel van Edom en al die nasies oor wie my Naam uitgeroep is, spreek IEUE wat dit doen.
- 13 Kyk, die dae kom, spreek IEUE, dat die ploëër die maaier inhaal, en die druiwetrapper die saadsaaier; en dat die berge van mos sal drup, en al die heuwels daarvan oorvloei sal wees.
- 14 En Ek sal die lot van my volk Isrhael verander, en hulle sal die verwoeste stede bou en bewoon, ook sal hulle wingerde plant en die wyn daarvan drink, en tuine aanlê en die vrugte daarvan eet.
- 15 En Ek sal hulle plant in hul land, en hulle sal nie meer uitgeruk word uit hul land wat Ek hulle gegee het nie, sê IEUE jou Aleim.